



Aplikasi i-Kitar akan diperluaskan pupuk budaya kitar semula

Oleh Zatul Iffah Zolkiply - September 30, 2023 @ 5:47pm

zatuliffah@bh.com.my

KUALA TERENGGANU: Kementerian Pembangunan Kerajaan Tempatan (KPKT) akan memperluaskan penggunaan aplikasi digital kitar semula, i-Kitar ke lebih banyak Projek Perumahan Rakyat (PPR) dalam usaha memupuk budaya kitar semula dalam kalangan rakyat.

Timbalan menterinya, Akmal Nasrullah Mohd Nasir, berkata aplikasi itu dibangunkan bersama Kementerian Sains dan Teknologi (MOSTI) serta pihak swasta yang diselia oleh Perbadanan Pengurusan Sisa Pepejal dan Pembersihan Awam (SWCorp) bagi meningkatkan kualiti sistem penyampaian perkhidmatan dengan pendigitalan aktiviti kitar semula ke arah pembayaran tanpa tunai.

Aplikasi yang dilancarkan hari ini sudah melalui tempoh percubaan sejak sebulan lalu dengan PPR Hiliran Kuala Terengganu dipilih sebagai projek rintis.

"Buat masa ini, kita sedang menilai tahap keberkesanan aplikasi untuk kita pertimbangkan bagi digunakan di 17 PPR di bawah KP KT yang memiliki pusat kitar semula.

"Kita sudah dapat lihat kejayaan daripada penggunaan aplikasi i-Kitar ini cuma pihak kami masih mengkaji lebih terperinci adakah ia memberikan impak positif atau ada masalah.

"Ia termasuk menilai juga perubahan sikap pengguna itu sendiri adakah perkara ini betul-betul memudahkan dan mengubah sikap masyarakat itu sendiri daripada mengumpul kepada kitar semula," katanya selepas merasmikan Program Inisiatif Komuniti PPR Sifat Sisa Bersamamu Madani Sempena Program Kemampanan Komuniti Bandar di PPR Hiliran, hari ini.

Akmal Nasarullah berkata, kira-kira 378,000 kilogram (kg) sisa pepejal dikitar semula melalui program Komuniti Sifar Sisa (KOSIS) di 17 PPR di seluruh negara sejak 2019 hingga Ogos tahun ini membabitkan nilai lebih RM113,000.

Katanya, daripada jumlah itu, hampir 110,000kg barang dengan nilai hampir RM33,0000 dikitar semula dalam tempoh Januari hingga Ogos lalu.

"Program KOSIS di PPR bukan sahaja membantu mengatasi masalah pembuangan sampah tetapi menghasilkan pendapatan sampingan kepada golongan B40," katanya.